

Bebas: Kassim bersyukur kepada Tuhan

Oleh JAMELAH BAKAR

PULAU PINANG, Khamis — Pengerusi Partai Sosialis Rakyat Malaya (PSRM), Encik Kassim Ahmad, bersyukur kepada tuhan di atas pembebasannya dan menganggapnya sesuatu yang tidak ternilai menjadi seorang manusia yang bebas semula.

"Saya sungguh gembira dapat balik ke pangkuan keluarga dan masyarakat, saudara yang belum pernah dalam tahanan tidak tahu betapa gembiranya menjadi manusia yang bebas," katanya kepada pemberita setibanya di rumah beliau di Gelugor di sini tepat jam 3.30 dari Kem Tahanan di Kemunting.

Encik Kassim, 47 tahun, disambut dengan gembira dan penuh rasa syukur oleh isterinya Syarifah Fawziah Syed Yusoff, anak sulungnya Cik Soraya, 19 tahun, dan kegembiraan lebih ketara dari anaknya yang bongsu Ahmad Shauqi, 14 tahun. Anaknya yang kedua Aida kini belajar di Maktab Perguruan Kota Bharu dan akan pulang berhari raya.

Setelah bersalaman dan berpelukan dengan beberapa ahli jawatankuasa PSRM, termasuk Encik Mohiddien, Penolong Setiausaha PSRM dan wartawan yang menunggu ketibaannya serta jiran-jiran. Beliau meminta diri selama 10 minit untuk membersihkan diri. Beliau masuk ke bilik dan meminta sejadah kepada isterinya bersembahyang zuhur.

"Saya anggap ini suatu hadiah Hari Raya yang paling istimewa untuk saya dan keluarga setelah ditahan selama 4 tahun 7 bulan," katanya.

Beliau juga berterima kasih dan berdoa agar Tuhan rahmati Menteri Dalam Negeri,

Datuk Musa Hitam yang juga Timbalan Perdana Menteri dan Datuk Seri Dr. Mahathir sendiri selaku Perdana Menteri yang bertanggungjawab atas pembebasannya.

"Ini merupakan tindakan negrawan yang agung dan budi mereka terhadap kami yang dibezakan tetap tidak dilupakan," katanya sambil menunjukkan kepada pemberita surat pembebasan tanpa syarat yang ditandatangani sendiri oleh Datuk Musa.

Bagaimanapun, Encik Kassim berharap dan berdoa agar rakan-rakannya yang berada di dalam tahanan di Kemunting dibebaskan serta merta dan ini, katanya, adalah bagi kes-kes yang semata-mata kes politik.

Negarawan

Beliau juga menganggap pembebasan beramal menjelang Hari Raya ini adalah satu sejarah yang tidak harus dilupakan dan tidak pernah berlaku bagi kes ISA.

Apabila ditanya rancangan masa depannya, Encik Kassim berkata beliau akan berihat satu atau dua bulan sebelum mencari pekerjaan yang tetap.

"Sekarang saya penganggur, saya harap akan bekerja sambil menulis dan akan terus giat dalam politik setakat kebolehan saya selagi tenaga dan khidmat saya dikehendaki oleh parti.

Menurut Encik Kassim, beliau juga akan menghabiskan sebuah bukunya yang mungkin dapat disiapkan dalam masa dua atau tiga bulan lagi.

Buku itu, yang asalnya hendak dibuat tesis PhD beliau, bertajuk "Falsafah dan Tiori Sosial Islam Moden" yang telah diusahakan selama tiga tahun mengarangnya.